

鄭經世上劄辭職

荅曰省劄具悉卿懇須勿固辭安心調理○丁酉日暈兩

珥○戊戌夜南力巽方有氣如火光○十二月朔己亥 上下教曰予聞前大司憲張顯光力學修身而不求聞達頃者累召觀其所為果符前聞將欲大用而顯光自以年老多病不肯仕宦予嘉其志許還田里度今年荒家食必艱其令所在官賜米豆饌物以表予嘉獎之意○諫院啓曰國家設科之法極嚴且重昏朝弊習不可不痛懲許稷行私之狀見出於本道查覈狀啓中極其狼藉稷則既已拿鞠自有其律而其所行私叅榜舉子不可仍存請令該曹查覈處置 從之○以金著國為承旨姜大進為掌令姜碩期為應教○庚子領議政李元翼出郊上疏言臣瀝血籲訴䟽劄辭單至於三十餘度違逆聖旨無人臣道理臣之罪大矣 上遣承旨敦諭曰卿之求解日切而予之持難尚有庶幾之望卿辭至此無以為心如此寒天出處郊外則必有添傷之患須速入來以安予心予當有後命焉○憲府啓曰許稷行私之跡昭著無疑其表表舉名者已至四人則其他暗昧行私之類想必不少且聞其試所外場借述者亦多有之遠近傳播藉藉人口如此循私不正之榜不可仍存請命盡罷其榜其叅榜人等軍籍考講時勿以入格例免講事請令該曹行會本道以正士習以杜後